

UKA2012-imi Naalakkersuisut inuusuttut 25-it inorlugit ukiullit qanoq amerlatigisut ullumikkut ilinniagaqalernissamut suliffeqalernissamulluunniit piareersimannginnerat pillugu nassuiaammik saqqummiussinissamik peqquneqarnissaannik Inatsisartuni aalajangiiffigisassatut siunnersuut. Tamatuma saniatigut inuusuttut uninngaannalernissamut aarlerinaateqartunut Piareersarfiup ataani suliniutigineqartunut aaqqissuussaasumik siunnerfilimmillu ilanngunneqarsinnaaneranut periarfissat nassuiaammi misissorneqassapput.

(Inatsisartunut ilaasortaq Akitsinnguaq Olsen, Siumut)

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSIISUTAA

Aalajangiiffigisassatut siunnersuutip aappassaanneerani saqqummiunneqartoq.

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq ukuninnga inuttaqarpoq :

Inatsisartunut ilaasortaq Andreas Uldum, (D), Siulittaasup tullia

Inatsisartunut ilaasortaq Hans Aronsen, (IA)

Inatsisartunut ilaasortaq Harald Bianco, (IA),

Inatsisartunut ilaasortaq Ruth Heilmann, (S)

Inatsisartunut ilaasortaq Aleqa Hammond, (S)

Siunnersuut UPA 2012/129-itut ulloq 19. april 2012-mi siullermeerneqareermat
ataatsimiititaliamit misissorneqarpoq.

Siunnersuutip imarisai siunertaalu

Siunnersuummi siunertarineqarpoq inuusuttut 25-it inorlugit ukiullit qanoq amerlatigisut ilinniagaqalernissamut suliffeqalernissamulluunniit piareersimannginnerat pillugu nassuiaasiortoqarnissaa. Tamatuma saniatigut suliniutit Piareersarfiup ataani ingerlanneqartartut inuusuttunut uninngaannalernissamut aarlerinaateqartunut aaqqissuussaasumik siunnerfilimmillu tulluarsarneqarnissaannut periarfissat nassuiaammi misissorneqartariaqarput.

Siunnersuummut tunngavilersuutitut Akileraartarnermut Atugarsaarnermullu Isumalioqatigiissitap isumaliutissiissutaani 2011-meersuni qupperneq 22 ilaatigut siunnersuuteqartup innersuussutigaa.

”Meerarpassuit meeqqat atuarfianni misilitsinneq angusimanngilaat massa taanna ilinniariaqqinnissamut piumasuseqalersitsillunilu tunngavissaliisaraluartoq. Amerlasuut ilinniarnermik aallartitsisarput, ilatigut takornartaangitsumk kingusinaartumik, ilinniakkanilu amerlanerpaani ilinniakkanik unititsiinnartarneq annertoorujussuuvoq. Amerlaqisut meeqqat atuarfiat qimattarpaat naammattumik iliniaqqinnissamut toqqammavissarsinatik. Ukioqatigiit 50 %-iisa missingi meeqqat atuarfianiissimanermik saniatigut ilinniagaqarneq ajorput.”

Siunnersuutip Inatsisartuni siullermeerneqarnera

Aalajangiiffigisassatut siunnersuut oqaluuserineqarmat politikikkut annertuumik isumaqatigiissutigineqarluni tapersorsorneqarpoq siunnersuullu Naalakkersuisut tikilluaqqaat aammalu qilanaaralugu nassuiaatip, 25-it inorlugit ukiullit qanoq amerlatigisut ullumikkut ilinniagaqalernissamut suliffeqalernissamulluunniit piareersimannginnerannik takutitsisup kiisalu qulaani pineqartunut aaqqissuussaasumik siunnerfilimmillu maanna suliniutit siunissamilu suliniutaajumaartut nassuiaatigineqarnerannik imaqartup, 2012-imi ukiakkut ataatsimiinnermi saqqummiunnissaa.

Tusarniaanermi akissutit

Ataatsimiititaliap siunnersuut Inuussutissarsiornermut Ataatsimiititaliamut tusarniutigaa, ataatsimiititaliallu nalunaarutigaa isumaqarluni siunnersuut piviusunnngortinneqartariaqartoq. Inuusuttut qanoq amerlatigisut uninngaannalernissamut aarlerinaateqartutut oqaatigineqarsinnaanersut paasissallugu qitiusoq Inuussutissarsiornermut Ataatsimiititaliaq isumaqarpoq, taamaalilluni pineqartunut siunertalimmik suliniuteqarneq aallartinneqarsinnaaqullugu. Inuussutissarsiornermut Ataatsimiititaliaq allanik oqaaseqaatissaqanngilaq, kaammattuutigaluguli siunnersuutip tapersersorneqarnissaa.

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap siunnersuummik suliarinninnera

Siunnersuutip piviusunnngortinneqarnissaa ataatsimiititaliamit annertuumik tapersersorneqarpoq.

Misissuinermi inuusuttut amerlassusiat kisimi pineqassanngitsoq ataatsimiititaliaq isumaqarpoq, kaammattuutigaluguli inuusuttut taama amerlatigisut sulilersimanningerannut imaluunniit ilinniakkamik aallartitsisimanninnerannut pissutaasinnaasut aamma isiginiarneqarnissaat, taamaaliornikkut inuusuttunut kisimi iluaqutaanngitsumik aammali nunatsinnut tamanut iluaqutaasumik pineqartunut suliniutit siunissami tulluarsarneqarnissaat siunertaralugu pissutaasimasinnaasut nassuiaatigeqqissaarneqarsinnaaqullugit misissuiffigeqqissaarneqarsinnaaqullugillu.

Kiisalu ilinniartitaanermi periusissap piviusunnngortinneqarnissaanut atatillugu misissuineq assut iluaqutaassasoq ataatsimiititaliaq isumaqarpoq, taamaaliornikkut ilinniartitaanikkut iliuusissatut isumaqatigiissutigineqartut tassungalu atatillugu aningaasalersuutigisariaqakkat sapinggisamik pitsaanerpaamik atorneqarsinnaaqullugit.

Kiisalu Piareersarfiup suliniutaasa aaqqissuussaasunnngortillugillu siunnerfilersorneqarnissaannut periarfissat pillugit misissuinissap siunnersuutigineqartup inuusuttunut ilinniartitaanikkut taamatullu suliffeqarnikkut siunissami suliniutissat qanoq

tulleriinnilersorlugit pingaarnersiorneqarnissaannut annertuumik sunniuteqarsinnaasoq ataatsimiititaliaq isumaqarpoq.

Siunnersuutip aningaasatigut kingunissai

Siunnersuutip piviusunngortinneqarnerani aningaasatigut kingunissat annerpaamik ukioq naallugu ullup affaani 250.000 kr.-inik naleqartumik atorfeqarnertut naleqassasut siunnersuuteqartup nassuiaatigaa. Aningaasartuutissat siunnersuutip allaffissornermi suliarineqarneranut nutserneqarneranullu kiisalu tamatuma kingorna attuumassuteqartunut tusarniaanermut atorneqassapput.

Siunnersuut inuttaasunut ataasiakkaanut, inuiaqatigiinnut kiisalu inuiaqatigiit aningaasaqarnerannut iluaqutaassasoq ataatsimiititaliaq isumaqarpoq, tassami siunnersuut ungasinnerusoq isigalugu amerlanerit siusinnerusukkut sulilersinnaanerannut taamaalillutillu imminnut pilersorsinnaalernerannut peqataaqataasinnaammat, tamannalu inuit ataasiakkaat naleqartutut misiginerannut iluaqutaassaaq peqatigisaanillu pisortat ikiorsiissutinut aningaasartuutaat ikilissallutik.

Taamatutaaq ungasinnerusoq isigalugu inuussutissarsiornermik ingerlataqartunut iluaqutissarsiffiusinnaavoq, tassa sulisartut ilinniarluarsimasut sulilernissamullu piareersimasut amerlanerulernissaannut siunnersuut peqataaqataasinnaasoq naatsorsuutigineqarsinnaammat.

Ataatsimiititaliap inassuteqaatai

Aalajangiiffigisassatut siunnersuut akuerineqassasoq ataatsimiititaliap isumaqatigiittup inassutigaa.

Taamatut oqaaseqarluni aammalu isumaliutissiisummi allassimasutut paasinnilluni ataatsimiititaliap siunnersuut aappassaaniigassanngortippaa.

Andreas Uldum

Siulittaasup tullia

Hans Aronsen

Harald Bianco

Ruth Heilmann

Aleqa Hammond
